

BARDEA. Ordubete eta laurden egon ziren, inor azaldu gabe, ustez zorrotz zainduta dagoen eremuaren barruan

Tiro eremuan sartu eta bonbardaketa geldiarazi dute hamar 'Euskal solidarioak'

'Bardeak herriarentzat' zioen pankarta zabaldu zuten tiro praktiketarako erabiltzen duten hegazkin zahar batean



MIKEL SAIZ

'Solidarioak' Vietnamgo gerran erabilitako Phantom hegazkin batean kateatu eta pankarta zabaldu zuten.

ATXILOTUAK

Denak aske

Atxilotuak Bardeako destakamendura eramanez zituen Guardia Zibilak lehendabizi, eta handik Tuterako koartelera gero. Nahiz eta *solidarioak* ohartarazita zeuden atxilotuta eramanez gero abokatuen laguntza eskatu behar zutela, ezta epaileren aurrean ere ez zuten pasa behar izan, arratsaldeko lauetaarako libre zeudelako denak. Atzo taldeko kide batek adierazi zuenez, desordena publikoa leporatuko zaie, seguruaski, eta isuna ordaindu beharko dute bederatzi kideek. *Solidarioek* oso positiboki baloratu zuten egindako ekintza, eta baketsua zela azpimarratu ondoren, ez zuten baztertu horrelako ekintza gehiago eginen direla aurrerantzean Bardeako tiro eremuaren aurka.

Alberto Barandiaran | IRUÑEA

Hamar *Euskal solidarioak* geldiarazi zituzten atzo, Bardean, Espainiako hegazkinen tiro bonbardaketak ekintza baketsu eta ikusgarri baten bidez. Ekintzailak bonbardaketa gori-gorian zegoela sartu ziren tiro eremu barruan, zuriz jantzita, eta tiro praktiketarako erabiltzen den hegazkin zahar batera igo ziren. Han *Bardeak herriarentzat. Burujabetza da bakea* lema zuen pankarta zabaldu, eta ikurrina eta Nafarroako bandera gorria paratu zuten hegazkinaren mutur hautsian.

Hori da tiro eremuaren barruan egiten den gisa horretako lehen ekintza, ariketa militarren aurkako oposizioaren historian inoiz ez delako inor tiro praktiketarako erabiltzen den eremu barruan sartu. Atzo bertan, Milagros Rubio tiro eremuaren kontrako plataformako kideak ziurtatu zuen *solidarioak* ez direla bertako kideak.

Nolanahi ere, NATOk Europan duen tiro eremu bakarraren zaintza zerbitzua oso kolokan jarri beharko luke atzoko ekintzak, ordubete eta laurden egon zirelako *solidarioak* tiro ere-

muaren barruan, militarrik azaldu gabe.

Hiru F-18 tiro ariketak egiten ari ziren bitartean

Goizeko hamarrak jo gabeak zirela hasi zen ekintza. Ordu horretan Espainiako Armadako hiru F-18 hegazkin tiro ariketak egiten ari ziren tiro eremuaren barruan. *Solidarioak*, orduan, eremu militarra inguratzen

duen bidetik gertuko etxola batetik atera ziren, Larraia eta Piskerra artean, eta errepidetik kilometro eskasera dagoen hegazkin-itura abiatu ziren, korrika: zuriz jantzita, eta aurpegia moztortuta.

Hegazkinera iritsi eta berehala hamar lagunek pankarta eta ikurrina zabaldu zuten, eta bertan kateatuta gelditu ziren haietarik bederatzi. Beste kidea ber-

tatik atera zen. Arriskua nabaria zen, F-18en jomuga gazteak ziren tokitik kilometro eskasera zegoelako, baina eremu barruan ikusi eta berehala bertan behera utzi zituzten bonbardaketa saioak. Hiru hegazkinak ordu erdi batez edo aritu ziren oraindik tiro eremuaren gainean hegaldatzen, bonbarik jaurti gabe, eta azkenean alde egin zuten.

11.15ean lehen mugimenduak sumatzen hasi ziren Bardeako destakamenduen inguruan, eta Armadako Patrol zuria hurbildu zen gazteengana. Bertan zeuden gazteek militarrek Bardeatik alde egiteko oihuak egin zituzten orduan, eta ibilgailuak buelta eman eta alde egin zuen ekarri zuen bide bere-tik.

Lehen militarrek armaturik, sartu eta ordubetera

Handik laurden batera Armadako beste ibilgailu bat iritsi eta bertatik bi militar jaitsi ziren, armaturik. *Solidarioen* ondoan gelditu ziren, zain. Han egon ziren Guardia Zibileko kideak iritsi ziren arte.

Hori eguerdi puntuan zela gertatu zen. Bi Patrol agertu ziren lehendabizi, eta zenbait automobil gero, laguntzeko edo.

Azkenean, bonbardaketa egunean, eta ustez zainketa trinkoa eduki beharko zuen eremu militarren barrura korrika sartu eta bi ordu eta erdira, *solidarioen* kateak hautsi, banan banan arakatu eta, atxiloturik, eramanez zituzten. Poliziak jaso zituen ere pankarta eta hiru banderak.

'SOLIDARIOAK'

«Bardeak ez du men egiten»

Ekintza egin ondorengo balorazioa *solidarioek* azpimarratu zuten «sikiera egun batez» bonbardaketak gelditu izana, eta salatu zuten hegazkin militarrek tiro eremua gehiago ez erabiltzeko «abagune historikoa» galdu dela. «Jendeak ez du nahi Bardea militarrek erabiltzea, baina bertako politikari anitzek saldu dute gure herriaren nahia. Esaten zuten bukatuko zela, baina lau sosen truke saldu dute berriro». Erriberako hainbat herritatik iritsitako gazteek egindako balorazioan «euskaldunek gure luraren gainean dugun subiranotasunik eza» salatu zuten. «Hemengo eskuinak, ordea, men egiten du Madrilgo interesen aurrean. Horregatik, azkenean lor-

tzen badugu militarrek tiro poligonoa uztea, hori izango da hemengo herritarren ekimenarengatik». Hori dela eta, Bardea herritar guztien esku jartzeko borrokan jarraitzeko gogoia adierazi zuten *solidarioek*. «Uste dugu Euskal Herriak ezin duela onartu Bardeak espainiar eta amerikar inperialisten menpean jarraitzea. Ezin dugu onetsi gure herriko lurralde berezietako baten bahitua segitzea ingurune herrietako, Nafarroako eta Euskal Herri osoko biztanleen interes eta borondatearen kontra. Bardeako defentsa, bere soro eta zelai guztien jabegoa mendeetan landu, zaindu eta maite izan dituen herriaren erabilpenerako itzultzea, euskal herritarrok itzuri ezin dugun nazio mailako premia da». Halaber, dei egin zuten «horrelako urrats txikiak» egiten jarraitzeko. «Bardeak ez du men egiten», azpimarratu zuten.